

28 FEB 1997

Mahathir-Everest

MAHATHIR LEPASKAN PESERTA PROJEK MALAYSIA-EVEREST '97

KUALA LUMPUR, 28 Feb (Bernama) -- Datuk Seri Dr Mahathir Mohamad hari ini mengibarkan bendera kebangsaan sebagai lambang melepaskan peserta projek Malaysia-Everest '97 ke arah mencapai satu lagi impian negara.

Upacara di Jabatan Perdana Menteri itu turut dihadiri Menteri Belia dan Sukan Tan Sri Muhyiddin Yasin dan Presiden Persatuan Pendaki Malaysia Noor Ramlle Sulaiman.

Perdana Menteri melancarkan projek menakluki Gunung Everest setinggi 8,848 meter di Dataran Merdeka pada 4 Jun lepas, sambil mencabar rakyat Malaysia untuk turut berjalan ke khutub selatan.

Projek anjuran bersama Kementerian Belia dan Sukan, Persatuan Pendaki Malaysia dan Yayasan Sukan dan Kebudayaan Malaysia menelan belanja RM4.5 juta dan merupakan ilham Dr Mahathir yang pernah berkata :

"Kita mesti mempunyai keyakinan mencapai semua impian kita, termasuk mendaki Everest, belayar merintang laut Pasifik, (serta) menakluki Artik dan Antartika."

Sebanyak 20 pendaki dari Persatuan Pendaki Malaysia akan cuba mendaki gunung itu, dan daripada kumpulan itu, hanya 12 termasuk dua jurukamera RTM, akan cuba naik hingga ke puncak gunung bagi meletakkan bendera Malaysia. Yang lainnya akan bertindak sebagai pengganti.

Pendaki dari persatuan itu terdiri daripada N.Mohanadas, Aimy Zairin Mohamed, Hussin Ali, M.Magendran, Zahidi Paiman, Zahari Salleh, Mohd Fauzan Hassan, Borhan Ibrahim, Mejar Mohd Rizan Mat Hassan dan Kpl M.Maniam.

Mereka berada dua minggu di Manali, India bulan lepas untuk menyesuaikan diri dengan keadaan di Himalaya sebagai sebahagian daripada persediaan untuk misi ini.

Program persediaan bermula pada 1995 yang meliputi latihan mendaki di India dan New Zealand.

Mereka akan berlepas ke Nepal dengan berbekalkan sehingga 100 tan makanan dan pakaian yang ditempah khas dari Itali, Perancis dan Amerika Syarikat yang dapat membantu mereka menghadapi cuaca sejuk yang kadangkala menjadi serendah -70 darjah Celsius.

Dari Kathmandu, kumpulan itu akan ke Kukula pada 4 Mac untuk urusan pentadbiran sebelum memulakan pendakian pada 9 Mac. Mereka dijangka sampai ke puncak antara 1 Mei dan 20 Mei.

Jika ekspedisi itu berjaya, Malaysia akan menjadi negara pertama di Asia Tenggara yang dapat menawan Gunung Everest.

Pada 29 Mei 1953 Sir Edmund Hillary yang dibantu oleh Tenzing Norgay Sherpa menjadi orang pertama sampai ke puncak gunung tertinggi di dunia itu.--

BERNAMA

ES MAI